

47

中國名山勝蹟志彙刊  
沈雲龍教授主編

揚

州

圖

K928.3/39:4

四

廣文  
出版社



中國名山勝蹟志叢刊第五輯  
沈雲龍主編

揚州圖

經

焦循  
江藩輯

(四)

文海出版社

有限公司  
印行

揚州圖經卷七

事志七 南宋

孝宗紀隆興元年春正月庚子以張浚進樞密使都督

江淮東西路軍馬

宋史三十三

四月癸未詔以白金二十五萬兩給江淮都督府軍費

同上

六月庚午張浚自盱眙還揚州

同上

癸酉下詔罪己張浚降授特進仍前樞密使江淮東西

路宣撫使官屬各奪二官

同上

按宋史張浚符離喪師之後自盱眙還揚州自劾故

有是命

八月丙寅陳俊卿以張浚降秩徙治上疏使浚自效疏入帝悟即復浚都督江淮軍馬浚遂以劉寶為淮東招

撫使

宋元通鑑八十一

十月辛巳詔江淮軍馬調發應援從都督府取旨餘事

悉以聞

宋史三十三

十二月丁丑以張浚為右僕射同中書門下平章事兼

樞密使仍都督江淮東西路軍馬

同上

隆興二年三月丙戌朔詔張浚視師江淮金軍退

宋元通鑑

八十

二

夏四月戊辰罷江淮都督府

宋史三十三

秋七月戊申蠲淮東內庫坊場錢一年

同上

八月辛巳張浚薨九月癸卯命湯思退都督江淮東西路軍馬辭不行乙巳命楊存中爲同都督錢端禮吳芾並爲都督府參贊軍事

同上

冬十月辛巳金人分道渡淮劉寶棄楚州遁

同上

十一月乙酉金兵軼境魏勝帥諸兵拒於淮陽金徒單克寧帥生兵至勝與力戰矢盡依土阜爲陣乃令步卒居前騎兵爲殿至淮陰東十八里中矢墜馬死楚州遂

陷

宋元通鑑八十二

丁亥復命王之望督視江淮軍馬

宋史三十三

丁丑詔臺諫侍從兩省官舉楚廬滁濠四州守臣

同上

閏月金人至揚州或請擊之楊存中不敢渡江獨臨江

固壘以自守王之望與湯思退表裏專以割地啖金為

得計帝詔都督擇利害擊金軍之望下令諸將不得妄

進朝廷趣行之望言王抃既還不可冒小利害大計言

者論之遂免

御批歷代通鑑輯覽八十八

乾道元年春正月辛未兩淮守令勸民種桑

宋史三十三

乙亥罷兩淮招撫司

同上

二月乙酉罷江淮都督府遣官檢察兩淮州縣賑濟饑

民  
上同

九月乙亥置沿淮諸州都巡檢  
上同

乾道二年八月辛未朔詔兩淮行鐵錢銅錢毋過江北

上同

丁丑蠲淮南放歸萬弩手差役  
上同

十二月癸酉詔三省侍從臺諫兩淮漕臣郡守條具兩

淮鐵錢交子利害以聞  
上同

乾道三年夏五月庚申修揚州城  
同上三十四

冬十月戊戌修真州城  
上同

令兩淮通行銅錢會子  
續宋編年資治通鑑八



乾道四年秋八月主管殿前司公事王琪奉詔按視兩

淮城壁琪擅令揚州增築新城楊民言不便劉琪乞罷

琪忤帝意既而琪以擅興工役降三官放罷

宋元通鑑八十三

乾道五年春正月甲戌措置兩淮屯田陳俊卿以兩淮

備禦未設民無固志請於揚州屯三萬人預爲之計仍

籍民家三丁者取其一以爲義兵帝以爲然詔卽行之

然爲眾論所持中止

同上

十一月癸丑朔復置淮東萬弩手名神勁軍

宋史三十四

十二月降會子收兩淮銅錢

續宋編年資治通鑑九

乾道六年三月己卯詔兩淮州縣官以繁簡易其任復

置江浙荆湖淮廣福建等路都大發運使以新知成都

府史正志爲之宋史三十四

夏四月辛巳朔罷鑄錢司歸發運使併淮東總領所歸

淮西總領所同上

乙未賜發運使史正志緡錢二百萬爲均輸和糴之用

同上

十二月癸酉罷發運司以史正志奏課不實責爲楚州

團練副使永州安置同上

乾道七年春三月庚寅遣使覈兩淮種麥同上

五月戊寅復置淮東總領所同上

六月壬申詔兩淮銀田每創增稅賦同上

八月丙辰詔兩淮民兵勿輸丁錢宋元通鑑八十四

乾道九年春正月以王之奇知揚州淮南安撫使續宋編年

資治通鑑九

三月丙辰復分淮南安撫司為東西路宋史三十四

淳熙元年春正月庚子罷兩淮將帥權攝官同上

丙午禁兩淮耕牛出境宋元通鑑八十五

淳熙二年春正月丁未以兩淮諸莊歸正人安業徐子

寅等行賞有差宋史三十四

九月乙卯朔湯邦彥請分揚廬州荆南襄陽府金州興

元府興州爲七路每路文臣一人充安撫使以治民武臣一人充都總管以治兵三載視其成以議誅賞從之

上同

淳熙四年十一月丁酉詔兩淮歸正人爲強勇軍

同上

淳熙五年十二月丙午禁兩淮銅錢復行鐵錢

同上三十五

淳熙七年二月戊戌罷瓜洲孳生馬監

同上

淳熙八年閏月修揚州城

同上

淳熙九年春正月丁丑命兩淮戍兵歲一更

同上

庚寅詔兩淮災旱州縣貸民稻種計度不足者貸以椿

積錢

同上

淳熙十年十一月乙丑降會子收兩淮銅錢同上

淳熙十一年春二月甲申詔兩淮萬弩手令在家閱習

許歲上材武者三人試授以官同上

淳熙十二年六月乙卯立淮東彊勇軍效用效士法同上

淳熙十六年冬十月壬寅蠲楚州高郵軍民負常平米

一萬四千餘石同上三十一

光宗紀紹熙元年夏四月乙酉詔兩淮措置流民同上

紹熙二年春正月庚寅朔命兩淮行義倉法同上

秋七月己未出會子百萬緡收兩淮私鑄鐵錢同上

十二月乙未增楚州戍兵一千五百人同上

庚子復出會子百萬緡收兩淮鐵錢同上

紹熙三年春正月收淮東鐵錢同上

秋七月壬辰修揚州城同上

八月甲寅詔兩淮行鐵錢交子同上

九月丙申勸兩淮民種麥同上

寧宗紀慶元元年春正月乙巳詔淮南南路荒歉諸州收

養遺棄小兒同上三十七

二月丁巳朔詔兩淮諸州勸民墾闢荒田同上

十二月癸亥置楚州弩手效用軍同上

慶元四年春正月丁卯兩浙江淮荆湖四川民流詔有

司舉行寬恤之政

續宋編年資治通鑑十二

嘉泰三年夏四月丙午出封樁庫兩淮交子一百萬命

轉運司收民間鐵錢

宋史三十八

冬十月命兩淮諸州以仲冬教閱民兵萬弩手

同上

嘉泰四年九月丙戌戒飭兩淮州縣遵守寬恤舊法

同上

冬十月庚子以資政殿大學士淮東安撫使張巖參知

政事

同上

開禧元年六月辛丑淮東安撫使鄭挺坐擅納北人牛

真及劫漣水軍事敗奪二官罷

同上

八月以殿前副都指揮使郭倪為鎮江都統守揚州

續宋

編年資治  
通鑑十二

十一月置殿前司神武軍五千人屯揚州同上

十二月增制馬軍司弩手中郎將厲仲方造戰車未及用而罷去周虎繼之用戰車敗敵於清水鎮同上

開禧二年夏四月甲子韓侂胄銳意用兵以鄧友龍爲兩淮宣撫使宋元通鑑九十五

六月甲辰鄧友龍罷兩淮宣撫使以丘密代之駐揚州兵凡十六萬一千四百餘人續宋編年資治通鑑十三

韓侂胄以師出無功罷友龍而以密代之駐揚州密至鎮部署諸將悉以三衙江上軍分守江淮要害尋斬郭



倬於鎮江

宋元通鑑九十五

案郭倪遣郭倬李汝翼會兵攻宿州敗還故罷鄧友

龍用丘密而斬郭倬也

八月壬申以淮東安撫司所招軍為御前強勇軍

宋史三十

八

十月金人渡淮圍楚州十一月以殿帥郭杲駐真州以

援兩淮丘密以簽書開督府既而圍真州郭倪棄揚州

走

周密齊東野語三

甲辰金人犯真州士民奔逃洩江者十餘萬鎮江守臣

宇文紹節亟具舟以濟之廩以食之於是濠梁安豐及

並邊諸戍皆沒矣

續宋編年資治通鑑十二年

十二月甲寅金人攻六合縣郭倪遣前軍統制郭候救

之遇於胥浦橋官軍大敗倪棄揚州走瓜洲渡

同上

開禧三年春正月丁丑朔壬宗罷己卯命知樞密院事

張巖督視江淮軍馬

宋史三十八

二月己未以沿江制置使葉適爲江淮制置使

同上

九月辛卯以趙淳爲江淮制置使乙未張巖罷韓侂胄

怒金人欲罪首謀和議遂輟復銳意用兵乃以淳鎮江

淮而罷張巖巖開督府九月費耗縣官錢三百七十萬

緡

宋元通鑑九十六

十二月癸卯以丘密為江淮制置大使

宋史三十八

時趙淳已為江淮制置使故加大字以別之

兩朝綱目備要十

嘉定二年三月戊午禁兩淮官吏私買民田

宋史三十九

秋七月壬寅命兩淮轉運司給諸州民麥種

同上

八月甲子聽兩淮諸州民行鐵錢於沿江八州

同上

丙戌發米十萬石賑兩淮饑民

同上

冬十月己丑命兩淮轉運司給諸路民稻種減公私房

廊白地錢什之三

同上

是歲諸路旱蝗揚楚盜起

同上

嘉定二年五月戊申經理兩淮屯田

同上

嘉定十年夏四月丙辰詔江淮制置使李珣措置調遣

仍聽便宜行事

同上  
四十

嘉定十二年二月庚戌以曾從龍同知樞密院事兼江

淮宣撫使

同上

九月丙午罷江淮制置司置沿江東西制置司以寶文

閣待制李大東爲沿江制置司淮南轉運判官趙善湘

爲主管淮西制置司公事淮東提刑

同上

李全傳嘉定十六年十一月許國自武階換朝議大夫

淮東安撫制置使命下聞者驚異十七年國之鎮楊氏

郊逐國辭不見楊氏慚以歸國旣視事痛抑北軍有與

南軍競者無曲直偏坐之李全固留青州國不能致寶慶元年全圖國之意已決遣劉慶福還楚城使爲亂潛約盱眙四軍相應忠義統領王文信有衆八百國之聚兵大閱文信在焉慶福與謀令歸襲揚州別遣將劫寶應事濟卽揮衆渡江盱眙四將不從謀遂中止欲快意於許國焉乙卯國晨起莅事忽露刃充庭國厲聲曰不得無禮矢已及潁國走親兵數十人翼國登城樓縋城走伏道堂中宿焉王文信復獻計慶福曰我僞作重傷提本部軍歸揚州揚守必不疑我生縛守以其城獻慶福喜夜飲而遣之丙辰許國縊於途丁巳文信將至

揚州其徒有亡入城告變者時揚之兵皆在楚知州兼提點刑獄汪統會同官議鈐轄趙拱曰若不納則文信必曰我歸營何故見拒將借是以魚肉城外之民拱素善文信請說止其兵而以單騎入俟入城而殺之後撫其兵統喜遣之遇文信於十里頭置酒相勞苦文信僞爲裏創狀拱曰忠義返楚州揚州人見忠義暮歸豈不相疑不若暫駐兵城外然後同見提刑提刑急欲知楚州事也文信不疑聯騎入城坐客次拱先入勸統收戮之統躊躇不敢發劉全知其謀帥甲士突入郡堂曰王統領好人提刑不必疑請出受參統不得已出而犒之

劉全以兵翼之出館其家詰旦統未有處拱又請引文  
信出城與議回屯楚州文信知事泄拱就出劉全亦請  
從至平山堂聞信責拱賣已欲殺之拱曰爾謀如此三  
城人命何辜我已存三城人身死無憾然我死汝八百  
家老幼在城豈得生耶文信及其衆動色文信劉全遂

還楚州

同上四百七十六

李全傳紹定二年李全密遣軍掠高郵寶應天長之間  
知高郵軍葉秀發遣宗雄武領民兵捍禦爲賊所敗

同上四百七十七

李全傳紹定三年全欲先據揚州以渡江分兵徇通泰

以趨海諸將皆曰通泰鹽場在焉莫若先取爲家計且使朝廷失鹽利乃挾大元李宋二宣差恫疑虛喝大元實未嘗資兵有識李宣差者曰此青州賣藥人也八月命通判揚州趙璫夫攝事乙巳金字牌進趙善湘煥章閣學士江淮制置大使范直徽猷閣知揚州淮東安撫副使葵直寶章閣淮東提點刑獄兼知滁州俱節制軍馬全子才軍器監簿制置司參議官詔促荆襄淮西諸軍赴援壬子全軍突至灣頭璫夫恐欲走副都統丁勝劫闖者止之全攻南門都統趙勝自堡砦提勁弩赴大城注射全稍退全遣劉全奄至堡砦西城下欲奪以瞰大



城先是趙勝屯西城見濠淺每日設有寇至未圍大城先襲堡若何可不備盛暑中督軍浚濠人皆苦之既浚勝決新塘水注焉及是劉全不能進勝又浚市河人尤謂不急全至勝開水門納賈舟千餘艘活者數千人糧貨不與焉時朝廷雖下詔討全而猶有內圖戰守外用調停之說是日礲夫得彌遠書許增萬五千人糧勸全歸楚州礲夫亟遣劉易卽全壘授全全笑曰丞相勸我歸丁都統與我戰非相給耶擲書不受惟畱省劄礲夫始知全給已亟發牌印迓范葵癸丑全塞泰州城濠于邦傑宗雄武通全戒守者毋得發矢俟薄城而蹙之全得

距堙宋濟恐令縣尉某如全壘全以增糧省檄示之尉復出獻錢二百萬以降乙卯邦傑雄武開門導全濟帥僚吏出迎全入坐郡治濟發帑出所獻錢全曰獻者獻汝私藏耶若泰州府庫則我固有何假汝獻爲乃舍濟僉判廳入郡堂盡收子女貨幣庚申全聞范葵旣入鞭衍德曰我計先取揚州渡江爾曹勸我先取通泰今二趙入揚州矣江其可渡耶莫敢對旣而曰今惟有徑擣揚州耳甲子全配兵守泰州悉出衆宜陵丙寅至灣頭立砦據運河之衝使胡義將先鋒馬駐平山堂伺二城機便丁卯全攻城東門不利賊將張友呼葵請見全隔

濠立馬相勞苦葵切責之全彎弓抽矢向葵而去戊辰  
張璉戴友龍王銓張青以天長制勇三軍至阻全不得  
前遣人請援范葵親出堡塞西門列陳待之全不敢動  
璉等乃入城庚午全晨率步騎五千餘攻堡塞西門趙  
勝兵戰不利范葵以兵益之全兵亦增葵擊却之辛未  
賊引兵二萬沿州城東向西門李虎趙必勝張璉崔福  
力戰自己至申全乃沿東門以歸必勝王鑑于俊擊走  
之襄兵萬人至真州上壩統制張達監軍張大連不設  
備魚貫而行全哨馬帥田四擊之爲數截殲者五千達  
大連死之淮西援兵至亦遇全統領桑青力戰城中俱

不知也襄兵敗全凶焰益振甲戌復引輕騎犯州城南門且欲破堰泄濠水統制陳達率勁弩射之范葵出軍迎擊乃去是日金玠等距淮安十里焚全砦柵全將劉全出戰玠軍不利退屯寶應全志吞三城而兵每不得傳城下宗雄武獻計曰城中素無薪且儲蓄爲總領所支借殆盡若築長圍三城自困乙亥全悉衆及驅鄉農合數十萬列砦圍三城制司總所糧援俱絕范葵命三城諸門各出兵劫砦舉火爲期夜半縱兵衝擊殲賊甚衆自是賊一意長圍以持久困官軍不復薄城戊寅全張蓋奏樂於平山堂布置築圍指揮閒暇范葵令諸門

以輕兵牽制親帥將士出堡砦西全分路鏖戰自辰至未殺傷相當庚辰范出師大戰玠等破全將張友於都倉獲糧船數十艘甲申葵出戰賊大敗四年正月辛卯全兵浚圍城塹范葵遣諸將出城東門掩擊全走土城官軍躡之蹂溺甚衆是日玠破全將鄭祥獲糧百艘甲午全兵千餘犯州城東門城中出兵應之全卽引去乙未李虎出南門楊義出東門王鑑出西門崔福出北門各徑扼賊圍開土城數處范葵提兵策應全步騎數千出戰諸軍奮擊俘馘甚衆夜賊復合所開城丁酉趙勝遣統制陸昌孫舉立橋堡砦於北門賊步騎分道來戰

勝擊退之范陳於西門賊閉壘不出葵曰賊俟我收兵  
而出爾乃伏騎破垣門收步卒誘之賊兵數千果趨濠  
側虎力戰城上矢石雨注賊退有頃賊別隊自東北馳  
至范葵揮步騎夾浮橋弔橋並出爲三選陣以待之自  
巳至未賊與大戰別遣虎顯廣必勝義以馬步五百出  
賊背而葵帥輕兵橫衝之三道夾擊用范所制長鎗果  
大利賊敗走翼日全遣步騎三百餘向城西門乍進乍  
退以誘揚州兵復驅壯丁增濠而培鹿角范葵遣騎將  
出夾城東西牽制之親出大城西門分二道以進賊望  
風潰乃募勇力齎薪砲焚其樓櫓十餘賊自平山堂揮

騎下救道遇後軍而歸始全反謀雖成然多顧忌且懼其黨不從邊陲好事者欲挾賊爲重或陰贊之朝廷愈畏則錢糧愈增又許身任調停之責故全兵將舉而張國明先召全之託詞陳遇棄城及歸過三趙圖已蓋成謀也及三趙用師削全官又罷支錢糧攻戰不利全始自悔或令左右抱其臂曰是我手否人皆怪之時正月望城中放燈張樂姑示整暇全見亦往海陸載妓女張燈平山堂矯情自肆是晚宴大元宣差宣差激全曰相公服飾器用多南方物乃心終在南耳全乃取詰勅朝服南向歷述生平梗概再拜褫服焚之歎曰國明誤我

淚下如雨收淚就坐強歡有胸山于道士者老矣迎致之初見全卽歎曰我業債合在州償召占事多驗尊爲軍師及見全焚誥命謂人曰相公死明日我無今日矣人問之曰朝廷以安撫提刑討逆然爲逆者節度使也豈有安撫提刑能擒節度使哉誥勅旣焚則一賊爾賊固安撫提刑所得捕不死何爲入見全曰相公明日出帳門必死全怒以爲厭已斬之范葵夜議誥朝所向葵曰東向利不如出東門范曰西出嘗不利賊必見易因其所易而圖之必勝不如出堡塞西門壬寅全置酒高會平山堂有堡砦候卒識其槍垂雙拂爲號以報范喜



謂蔡曰此賊勇而輕若果出必成擒矣乃悉精銳數千而西取官軍素爲賊所易者張其旗幟以易之全望見喜謂宣差曰看我掃南軍官軍見賊突鬪而前亦不知其爲全也范揮軍並進蔡親搏戰諸軍爭奮賊始疑非前日軍欲走入土城李虎軍已塞其甕門全窘從數騎北走蔡帥諸將以制勇寧淮軍蹙之賊趨新塘新塘自決水後淖深數尺會久晴浮戰塵如燥壤全騎陷淖不能拔制勇軍奮長槍三十餘亂刺之全曰無殺我我乃頭目先是令諸陣士衆獲頭目無得爭以爲獻故羣卒碎其尸而分其鞍馬器甲并殺三十餘人甲辰賊軍全

椒人周海請降報全已殺餘黨議潰去未幾聞安用歎  
恨飲泣初議推一人爲首以竟其逆莫肯相下欲還淮  
安奉楊氏范夜上捷書制置司議翼日追賊乙卯早安  
用引五百騎徑南門趨灣頭范弩射之賊呼曰爾襄  
陽援兵已敗走汝知之乎城中應曰汝李全已爲戮汝  
何不降賊不應諸將欲追賊范懼有伏兵先分兵燒圍  
城樓櫓夜半火光燭天命東南諸門皆出兵范葵繼提  
精兵進四鼓賊大潰丙午黎明葵追及賊於灣頭大戰  
又破之俘斬及奪回糧畜蔽野別將追至大儀不及葵  
使人瘞新塘骸骨得左掌無一指蓋全支解也先是全

乞靈茅司徒廟無應全怒斷神像左臂或夢神告之曰  
全傷我全死亦當如我至是果然揚州平善湘以露布  
上帝驚喜太后舉手加額國明懼禍及已倡論云全未  
死至有資遊士吳大理等助煽之及泰州凱奏繼上浮  
言始定甲寅善湘來犒師同上

李全傳李全者濰州北海農家子銳頭蠡目權譎善下  
人以弓馬矯捷能運鐵槍時號李鐵槍初大元兵破中  
都金主竄汴賦斂益橫遺民保巖阻思亂於是母舅劉  
全爲帥大元兵退金乃遣完顏霆將花帽軍二千討之  
敗安兒於闌頭募其頭千金舟人斬以獻安兒妹四娘

子狡悍善騎射劉全收潰卒奉而統之稱曰姑姑全以其衆附楊氏通焉遂嫁之有沈鐸者鎮江武鋒卒也亡命盜販山陽誘致米商斗米輒售數十倍知楚州應純之償以玉貨北人至者輒舍之安兒之未敗也有意歸宋招禮宋人定遠民季先者嘗爲大俠劉佑家廝養客山陽安兒見而悅之處以軍職安兒死先至山陽寅緣鐸得見純之道願附之意時江淮制置李珣淮東安撫崔與之皆令純之沿江增戍恐不能禦乃命先爲機察諭意羣豪敘復鐸爲楚州都監與高忠皎各集忠義民兵分二道攻金先遂以李全五千人附忠皎全分兵襲

破莒州克密州兗福克青州始授全武翼大夫京東副

總管同上

理宗紀紹定五年春正月庚寅詔李全之叛淮東提刑  
司檢法吳澄等出泰州城謁賊各追官勒停其不出城  
見賊者高夢月劉賓雲循升二資罵賊而死者海陵簿  
吳嘉特贈朝奉郎官其一子將仕郎同上四十一

紹定六年春正月己酉以趙善湘光祿大夫江淮制置

大使兼知建康府行宮留守加食邑四百戶同上

十一月癸亥進趙葵兵部侍郎淮東制置使兼知揚州

丁卯詔趙葵任責防禦同上

端平元年五月丙辰以趙范爲兩淮制置使節制軍馬兼沿江制置副使同上

端平二年十一月乙丑以曾從龍爲樞密使督視江淮軍馬同上四十二

十二月庚寅曾從龍六疏乞寢樞密使命依舊知樞密院事督視江淮軍馬詔許辭樞密使以魏了翁兼省視江淮軍馬同上

端平三年五月甲申以趙葵爲淮東制置使兼知揚州葵墾田治兵邊防以飭宋元通鑑一百十

十一月蒙古將察罕攻眞州知州丘岳部分嚴明守具

周悉蒙古薄城輒敗岳乘勝出戰於胥浦橋以強弩射其致師者一人死之敵兵少却岳曰敵衆十倍於我不可以力勝也乃爲三伏設砲石待之於西城敵至伏起砲發殺其驍將敵衆大擾岳選勇士襲敵營焚其廬帳越二日皆引去同上

嘉熙元年十一月戊辰詔陳韓史嵩之趙葵於沿江淮漢州軍備舟師戰具防遏衝要堡隘宋史四十二

嘉熙二年夏四月癸未以李直同簽書樞密院事督視

江淮軍馬同上

冬十月丁卯吳潛言宗子趙時暉集真滁豐濠四郡流

民十餘萬圍結十七砦其強壯二萬可籍爲兵宜補時  
暖官又沙上蘆場田可得二十餘萬畝賣之以贍流民  
以佐砦兵從之同上

嘉熙三年春正月癸酉以史嵩之右丞相兼樞密使督

視兩淮軍馬同上

嘉熙四年九月乙丑詔余玠進三秩直華文閣淮東提

刑節制招信軍屯戍軍馬同上

初玠家貧落魄無行亡命走揚州上謁趙葵葵壯之留

置幕府俾帥舟師沂淮入河抵汴所向有功批歷代通御

鑑輯卷  
九十二



太宗紀壬寅年春太皇太后稱制秋七月張柔自五河口

渡淮攻宋揚滁和等州

宋濂等元史二

案壬寅年宋理宗淳祐二年也時元太宗后稱制故

無年號

八月丁卯詔淮東先鋒馬軍鄧淳李海等揚州撻扒店

之戰宣勞居多各官兩轉餘推恩有差

宋史四十二

淳祐三年春正月乙未以李曾伯為華文閣待制依舊

淮東西制置使知揚州

同上

二月乙丑以呂文德總統兩淮軍馬捍禦邊陲

宋元通鑑一百

二十

九月壬申蠲高郵民耕荒田租宋史四十二

淳祐四年春正月壬寅朔以李曾伯寶章閣直學士依

舊淮東安撫制置使知揚州同上四十三

二月癸酉出封樁庫緡錢十萬命兩淮置司收瘞頻年

交兵遺骸立爲義冢同上

乙巳年秋后命馬步軍都元帥察罕等率騎二萬與張

柔掠淮西及揚州宋制置趙葵請和乃還元史二

案乙巳年宋理宗淳祐五年也

淳祐六年春二月甲戌以丘岳兼兩淮屯田副使宋史四十一

三

淳祐七年夏四月辛丑以趙葵爲樞密使兼參知政事  
督視江淮軍馬同上

淳祐九年春正月辛酉詔兩淮曠土軍民從便耕種同上

淳祐十年春三月庚寅以賈似道爲端明殿學士兩淮

制置大使淮東安撫使知揚州同上

淳祐十二年春三月辛巳城寶應詔移一軍戍守同上

宰輔表寶祐二年甲寅賈似道除銀青光祿大夫同知

樞密院事兩淮制置大使兼淮南南東西路宣撫使知揚

州軍州事兼管內勸農營田屯田等政臨海郡開國公

加封邑同上  
百十四

寶祐三年二月己卯復廣陵堡城賈似道以圖來上同上

四十四

宰輔表寶祐四年四月賈似道自同知樞密院事進參知政事依舊兩淮制置大使兼淮東西安撫使兼知揚

州同上二  
百十四

宰輔表寶祐五年正月丁亥賈似道自金紫光祿大夫參知政事除知樞密院事依舊兩淮制置大使兼兩淮

宣撫使兼知揚州同上

二月戊午以賈似道爲兩淮安撫使同上四  
十四

寶祐六年夏六月癸巳臺臣戴慶炯劾淮東統領趙與

豈奪職鑄秩上同

冬十月戊子大元兵攻通泰州上同

十一月壬子以賈似道樞密使兩淮宣撫使上同

開慶元年春正月丁卯賈似道以樞密使爲京西湖南

北四川宣撫大使都大提舉兩淮兵甲上同

戊辰以李庭芝權知揚州上同

二月庚辰以趙與簞爲觀文殿學士兩淮安撫制置使

兼知揚州上同

九月癸亥出內庫緡錢五百萬銀二萬兩帛二萬疋給

兩淮制司以資軍賞上同

十一月丙辰選揚州拱衛軍千人赴京聽調遣同上

景德元年五月戊辰朔詔趙葵依舊少保兩淮宣撫使

判揚州進封魯國公同上四十五

乙未詔李庭芝起復秘閣修撰主管兩淮安撫制置司

公事兼知揚州同上

秋七月戊子蒙古使者郝經來告即位且徵前日請和

之議先是賈似道在鄂州私與蒙古議和妄奏鄂州圍

解還朝使其客廖瑩中撰福華編稱頌鄂功通國皆不

知所謂和也經至宿州遣其副使何源劉人傑請入國

日期不報經數遺書於三省樞密院及兩淮制置使李

庭芝賈似道恐經至泄謀拘經於眞州之忠勇軍營經數上書於帝皆不報驛吏棘垣鑰戶晝夜守邏欲以動經經不屈蒙古遣詳問官崔明道李全義詣淮東訪問經等所在李庭芝奏蒙古使者久畱眞州亦爲似道所

格

宋元通鑑一百十八

景定二年夏四月丙申李庭芝右修文殿修撰樞密都

承旨兩淮安撫制置副使知揚州

宋史四十五

景定四年九月甲申詔趙汝楨爲本府少卿淮東總領

財賦

同上

度宗紀咸淳二年冬十一月辛丑兩淮制置使李庭芝

立城屯駐武銳一軍以工役費用及圖來上詔獎勞之

同上四十六

蒙古郝經居眞州館七年從者怒鬪死者數人經獨與

六人處別館

宋元通鑑一百二十一

咸淳四年春正月己丑檄知郢州翟貴兩淮都統張世

傑申嚴備禦

宋史四十六

咸淳五年春正月丁未以李庭芝爲兩淮制置大使兼知揚州時揚新遭兵火公私蕭然庭芝放民負鹽二百餘萬又鑿河四十里入金沙餘慶塲以省車運始平山堂瞰揚城敵至則構望樓其上張弓弩以射城中庭芝



大築城包之募汴南流民二萬餘人以實之號武銳軍

修學賑饑民德之如父母宋元通鑑一百二十二

夏四月癸巳李庭芝特進一秩宋史四十六

高郵縣夏世賢七世義居詔署其門同上

六月庚子李庭芝辭免兼淮東提舉不允同上

咸淳六年春正月壬寅以印應雷為兩淮安撫制置使

同上

按是時李庭芝督師援襄樊故有是命

咸淳九年冬十月丁丑兩淮制置使印應雷告老進二

秩致仕李庭芝兩淮安撫制置使錢二百萬繳犒備禦

上同

十一月甲午詔從李庭芝請分淮東西制置為兩司就

命庭芝交割淮東上同

咸淳十年十一月戊寅贈趙文義清遠節度使與其兄

威武軍節度使文亮共立廟揚州賜名傳忠同上四十七

庚辰以陸秀夫參議淮東制置司事李庭芝在淮南聞

秀夫名辟置幕下時天下稱得士多者以淮東第一號

小朝廷宋元通鑑一百二十四

世祖紀至元十二年春二月甲辰以中書右丞博魯歡

為淮南都元帥元史八

賜陳言人霍昇張和鈔十錠俾從淮東元帥府南征  
辛亥遣同知濟南府事張漢英持詔諭淮東制置使李  
庭芝同上

辛酉大軍次丁家洲戰船蔽江而下宋賈似道分遣步  
帥孫虎臣及督府節制軍馬蘇劉義集兵船於江之南  
北岸似道與淮西制置使夏貴將後軍戰船二千五百  
餘艘橫亘江中翌日伯顏命左右翼萬戶率騎兵夾岸  
而進繼命舉巨砲擊之宋兵陣動夏貴先遁似道東走

揚州同上

賈似道至江上以汪立信爲端明殿學士江淮招討使

俾就建康府庫募兵既至建康守兵悉潰立信率所部  
數千人至高郵聞賈似道師潰江漢守臣望風降遁歎  
曰吾今日猶得死於宋土也乃置酒召賓僚與訣手自  
爲表起居三宮與從子書屬以家事於是失聲三日扼

吭而卒

宋元通鑑一  
百二十五

行人郝經尙留儀真元主復使禮部尙書中都海牙及  
經弟行樞密江都事郝庸等來問執行人之罪賈似道  
震恐乃遣總管段佑以禮送經歸

三月辛丑勅阿木分兵取揚州

元史八

夏四月庚申元兵東下所過迎降李庭芝率勵所部固

守揚州阿朮遣李虎持招降榜入城庭芝殺虎焚其榜  
總制張俊出戰持降臣孟之縉書來招降庭芝復焚其  
書梟俊首於市時出金帛牛酒燕犒將士人人感激自

奮

宋元通鑑一  
百二十五

壬戌阿朮攻真州知州苗再成宗子趙孟錦帥兵大戰  
於老鸛觜敗績同上

癸亥阿朮師駐瓜洲距揚州四十五里宋淮東制置司  
盡焚城中廬舍遷而去阿朮創立樓櫓戰具以守之元史  
八

庚午阿朮乘勝進趨揚州姜才爲三疊陣逆之於三里

溝敗之阿朮佯退逐之阿朮反戰至揚子橋揚州撥發  
官雷大震出戰死之兩軍夾水而陣元張宏範以二十  
騎絕渡衝才軍才軍堅不可動宏範引卻以誘之才將  
回回驩馬出衆奮大刀直前向宏範宏範反轡迎刺之  
回回應手而仆元立陣者歡聲震地才軍遂潰阿朮與  
宏範追之自相蹂踐與陷壕水死甚衆流矢中才肩才  
拔矢揮刀而前元軍辟易不敢逼

宋元通鑑一百二十五

秋七月癸巳以夏貴知揚州

宋史四十七

案宋史徒貴知揚州貴不至

甲午遣使持詔招諭宋李庭芝及夏貴

元史八

八月壬寅加夏貴樞密副使兩淮宣撫大使宋史四十七

九月甲午宋揚州都統姜才將步騎萬五千人攻灣頭

堡阿朮阿塔海擊敗之元史八

案宋史姜才傳攻灣頭事在德祐二年四月

元兵陷泰州孫虎臣自殺宋元通鑑一百二十五

案孫虎臣與張世傑焦山敗後虎臣還真州不知何

時至泰州俟考

冬十月元阿朮攻揚州久而無功乃築長圍困之城中

食盡死者枕籍滿道而李庭芝之志益堅曾伯顏至灣

頭遂議深入上同

十一月戊寅元將阿刺罕破銀樹東壩戍將趙淮兵敗  
被執元帥阿朮使淮招李庭芝降許以大官淮佯許諾  
至揚城下乃大呼曰李庭芝爾爲男子死則死耳毋降  
也阿朮怒殺之淮葵之子也同上

癸未大元兵破興化縣知縣胡拱辰自殺宋史四

姜才傳德祐二年二月五奉使及一閭門宣贊舍人持  
謝太后詔來諭才發弩射却之復以兵擊五奉使於召  
伯堡大戰而退同上四百五十二

二十九日子自京口議趣眞州杜架閣崙與帳前將余  
元慶謀至眞州三月朔至城下問者羣望告以文丞相



在鎮江走脫徑來投奔城子諸將校皆出卽延入城苗  
守迎見語國事移時感憤流涕卽歛之州治中住清邊  
堂然後從者始至引至直司搜身上軍器旣知無他然  
後見信文天祥文  
山集十二

案元巴延欲執政面議太后乃以文天祥與吳堅偕  
往巴延拘天祥隨祈請使北行至鎮江

子至真苗守再成爲予言近有樵人破一樹樹中有生  
成三字曰天下趙亟取木視之果然木一丈二尺圍其  
字青而深半樹解揚州半樹畱真州三字瞭然不可磨

也  
同上

予至眞州第三日苗守約云早食後看城子予欣然諾  
之有頃陸都統來導予至小西門城上閒看未幾王都  
統至迤邐入城外王忽云有人在揚州供得丞相不好  
出制司小引視之乃脫回人供北中所見云有一丞相  
差往眞州賺城予方歎腕間二都統忽鞭馬入城小西  
門閉矣不得復入予幸脫身至眞州卽議糾帥兩淮以  
圖恢复制使疑予爲北用欲見殺江南與北中皆知予  
忠義而兩淮不予信天地茫茫與誰語哉同上

予在門外久之忽有二人來曰義兵頭目張路分徐路  
分也予告以故二人云安撫傳語差某二人看相公去

那裏予云必不得已惟有去揚州見李相公路分云且  
行且行良久有五十人弓箭刀劍來從二路分騎馬以  
二馬從予與杜架閣連轡而發同上

予在小西門外皇皇無告同行杜架閣仰天呼號幾赴  
壕死從者皆無人色苗守又遣衣被包複等來還遂之  
揚州是日上巳日也同上

二路分引予行數里忽提刀於野駐足不行二路分請下  
馬云有事商景色可駭予下馬與之立談二路分云今  
日之事非苗安撫意乃制使欲殺丞相安撫不忍加害  
故遣某二人送行今欲何往乎予云只往揚州彼云揚

州殺丞相奈何曰莫管信命去二路分云安撫令送往  
淮西予云淮西皆北所在無路可歸只欲見李制使若  
能信我尚欲連兵以圖恢復否則卽從通州遵海還闕  
二路分云安撫見辦船在岸下丞相從江行或歸南歸  
北皆可予驚曰如此則安撫亦疑我矣二路分見予辭  
眞確乃云安撫亦疑信之間令某二人便宜從事某見  
相公口口是忠臣某如何敢殺相公旣眞箇去揚州某  
等却送去時舉所攜銀一百五十兩與五十兵且許以  
至揚州二路分許以分賜金百兩遂行二路分所引路  
乃淮西路旣見予堅欲往揚州遂復取揚州路是日行

至暮二路分先辭去留二十人送至揚州二十人者又  
行十數里勒取白金亦辭去揚州有販鬻者以馬載物  
夜竊行於途曰馬塚子二十人者但令隨馬塚子卽至  
揚州西門至揚州西門憊甚有三十郎廟僅存牆堦屋  
無矣一行人皆枕籍於地時三鼓風寒露濕悽苦不可  
道杜架閣以爲制臣欲殺我不如早尋一所趨高郵至  
通州渡海歸江南或見二主伸報國之志徒死城下無  
益余元慶引一賣柴人至云相公有福問能導至高沙  
否曰能曰何處可暫避一日曰儂家可曰此去幾里曰  
二三十里曰有哨否曰數日不一至曰今日哨至如何

曰看福何如耳同行通十二人行止未決余元慶李茂  
吳亮蕭發遠生叛心所懷白金各一百五十星攜以走  
予不得已去揚州城下隨賣柴人趨其家天色漸明行  
不能進至十五里頭半山有土圍一所舊是民居毀蕩  
之餘無椽瓦其間馬糞堆積時惟恐北有望高者見一  
隊人行卽來追逐只得入此土圍中暫避旣入土圍中  
四山闐然無一人影無米可飯有米亦無烟火可炊懷  
金無救也土圍糞穢不可避但掃淨數尺地以所攜衣  
服貼襯地面睡起復坐坐起復睡忽有數千騎隨山而  
行正從土圍後過一行人無復人色傍壁深坐恐門外

得見若一騎見來卽無瞧類矣時門前馬足與箭筒聲  
歷落在耳只隔一壁幸而風雨大作騎徑去予與杜架  
閣及金應張慶夏仲呂武王青鄒捷共八人在土圍中  
時已過午謂哨不來山下一里有古廟廟中有丐婦居  
之廟前有井亟遣呂武鄒捷下山汲水意或可以得米  
菜少救饑餓不料哨至二人被獲二人解所腰白金近  
三百兩悉以與之比受金得不殺及哨過二人方回早  
從賣柴人行不能前遂至於土圍中約賣柴人入城糴  
米救性命云是日北數百騎薄西城於是門不開賣柴  
人竟不得出予等饑窘失措又以土圍中露天不可睡

於是下山投古廟中與丐婦人同居焉旣至廟中坐未定忽有人攜梃至良久三四人陸續來吾意不免矣乃知其人自城中來夜討柴來早入城赴賣無惡意也數人煮糝羹出其餘以遺我予見諸樵夫幸而可與語告以患難厚許之使導往高沙賴其欣然見從謂此處不是高沙路方駐堡城北門賈家莊少駐一日却爲入城糴米買肉以救兩日之飢又僱馬辦乾糧以備行役於是五更隨諸樵夫往焉予初五日隨三樵夫黎明至賈家莊初四日子在桂公塘北騎數千東行莫知其故至賈家莊有樵夫云昨夜北營甘泉山去城四十里有白



鬚老子設青罍慰飯於救生寺竈前稱南朝相公問其  
何如曰面大而體肥以意逆之則則堂先生也予僱騎  
夜趨高郵越四十里至板橋迷失道一夕行田畝中不  
知東西風露滿身人馬飢乏旦行霧中不相辨須臾四  
山漸明忽隱見北騎道有竹林亟入避須臾二十餘騎  
遶林呼噪虞候張慶右眼內中一箭項二刀割其髻裸  
於地帳兵王青縛去杜架閣與金應林中被獲出所攜  
黃金賂邏者得免于藏處距架閣不遠北馬入林過吾  
傍三四皆不見僕夫鄒捷卧叢篠下馬過踏其足流血  
總轄呂武親隨夏仲散避他所先是自揚州來有引路

三人牽馬三人至是或執或逃僅存其二二人出於無聊各操艇相隨有無禮之志逡巡行路無可奈何至晚忽遇樵者數人如佛下降偶得一籬以繩維之坐於籬中六夫更迭負送馳至高郵城西天已曉不得渡常恐追騎奄至宿陳氏店以茅覆地忍飢而臥黎明過渡而心始安予至高沙姦細之禁甚嚴時予以籬爲轎見者憐之又張慶血流滿面衣衫皆污人皆知其爲遇北不復以奸細疑然聞制使有文字報諸郡有以丞相來賺城令覺察關防於是不敢入城急買舟去高郵水與灣頭通下海陵入射陽通漣水皆其路也二月六日城子河

一戰我師大捷人指某處是戰場自至城子河積尸盈野水中流尸無數臭穢不可當上下幾二十里乃北以二月六日載奉使柳岳洪雷震併輜重俱北嵇家莊擊其前高郵擊其腰北大喪敗柳岳死焉洪雷震今在高郵見北說入江淮惟此戰我師大勝自高郵至嵇家莊方有一團人家以水爲寨統制官稽聳其子德潤請鄉舉其姪昌其館客莆田人林希驥字千里林孔時字願學皆銳意於事功者稽設禮甚至云今早報灣頭馬出到城子河邊不與之相遇公眞福人也爲之嗟嘆不置願學同德潤送予至泰州

同上

閏月謝太后與帝隨元兵北行至瓜洲李庭芝與姜才涕泣誓將士出兵奪兩宮將士皆感泣乃盡散金帛犒兵以四萬人夜搗瓜洲戰三時衆擁帝避去才追戰至浦子市眞州苗再成亦謀奪駕不克

宋元通鑑一百二十六

夏四月乙丑朔阿朮以宋高郵寶應嘗餽揚州遣蒙古將軍苦徹及史弼等守之別遣都元帥李魯歡等攻

泰州之新城

元史九

宋益王景炎元年五月召李庭芝爲右丞相姜才爲保

康軍承宣使

宋元通鑑一百二十六

秋七月李庭芝姜才赴召至泰州揚州守將朱煥泰州

裨將孫貴等皆降於元庭芝才死之淮東盡陷初臨安  
既陷阿朮以太皇太后手詔諭庭芝使降庭芝登城謂  
使者曰奉詔守城未聞以詔諭降也及帝次瓜洲太皇  
太后復賜庭芝詔庭芝不答命發弩射使者斃一人餘  
皆奔去阿朮乃遣兵守高郵寶應以絕其餉道博羅懼  
又攻拔泰州之新城驅夏貴淮西降卒至城下以示庭  
芝阿朮復遣使者持元主詔招庭芝庭芝開壁納使者  
斬之焚其詔於陴上既而淮安盱眙四州以糧盡降元  
庭芝猶括民間粟以給兵粟盡又令官人出粟粟又盡  
令將校出粟雜牛皮麩葉以給之兵有自食其子者然

猶力戰不屈姜才聞高郵米運將至出步騎五千戰于  
丁村自夜達旦元兵多敗董士元戰死阿朮使伯顏察  
救之所將皆阿朮麾下才軍識其旗幟皆潰才脫身走  
阿朮請元主降詔赦庭芝焚詔殺使之罪令早歸歛庭  
芝不納會福州使至庭芝命制置副使朱煥守場而自  
與姜才將兵七千趨泰州將東入海庭芝既行煥卽以  
城降阿朮分道追及庭芝殺步卒千餘人庭芝走入泰  
州阿朮圍之且驅其妻子至陣下詔降會姜才疽發背  
不能戰泰州裨將孫貴胡惟孝尹端甫李遇春開北門  
納元軍庭芝赴蓮池中水淺不死遂與姜才俱被執至

揚州阿末責其不降才曰不降者我也憤罵不已然猶愛其才勇未忍殺之朱煥請曰揚自用兵以來積骸滿野皆庭芝與才所爲不殺之何俟阿末乃皆殺之揚民間者莫不泣下有宋應龍者爲泰州諮議官秦守孫良臣之弟舜臣自軍中來說降良臣召應龍與計應龍極陳國家恩澤君臣大義請殺舜臣以戒持二心者良臣不得已殺之及泰州降應龍夫婦自經死提刑司諮議褚一正置司高郵督戰被創沒水死同上

八月元軍入眞州苗再成死之時揚州旣破元兵攻眞州益急趙孟錦乘霧襲其營少頃霧開元兵見孟錦兵

少逐之孟錦登舟失足墮水中死城遂陷再成不屈死

上同

揚州圖經卷七終



